

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

**Ilinniarnertuunngorniartarneq pillugu Inatsisartut inatsisaata allanngortinnera pillugu
Inatsisartut inatsisaattut siunnersuut nr. xx,xx xx 2015-imeersoq
(Atorfinitsitsinerimut soraarsitsinerimullu pisinnaatitsinerit)**

Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq

Pillugu

ISUMALIUTISSIISSUTAA

Siunnersuutip aappasaanneerreqarnerani tunniunneqartoq

Kultureqarnermut Ilinniartitaanermut Ilisimatusarnermut Ilageeqarnermullu Ataatsimiititaliap suliaqarnermini makkuninnga inuttaqarpoq:

Inatsisartunut ilaasortaq Vivian Motzfeldt, Siumut, Siulittaasoq
Inatsisartunut ilaasortaq Peter Olsen, Inuit Ataqatigiit, Siulitaasup tullia
Inatsisartunut ilaasortaq Suka K. Frederiksen, Siumut
Inatsisartunut ilaasortaq Poul Hansen, Demokraatit
Inatsisartunut ilaasortaq Mimi Karlsen, Inuit Ataqatigiit

UKA2015-mi ulloq 20. oktober 2015 siunnersuutip siullermeerneqarnerata kingorna siunnersuut Kultureqarnermut Ilinniartitaanermut Ilisimatusarnermut Ilageeqarnermullu ataatsimiititaliamit misissorneqarpoq.

Siunnersuutip imarisaa siunertaalu

Naalakkersuisut Inatsisissatut siunnersuutaanni siunertaavoq atorfinitsitsisarnermut soraarsitsisarnermullu oqartussaaffik nunatsinni ilinniarnertuunngorniartarfinni rektorinut/lektorinut tamakkiisumik tunniunneqarnissaat. Ilinniarnertuunngorniartarfiit pillugit Inatsisartut inatsisaanni nr. 13. 22. november 2011-meersumi (ilinniarnertuunngorniartarfiit pillugit inatsit) § 62, imm. 4. oqaaseqatigiit siulliip allanngortinneqarneratigut tamatuma pinissaa kissaatigineqarpoq. Inatsit pineqartoq taama iluseqartillugu Naalakkersuisut atorfinitsitsisarnermut soraarsitsisarnermullu oqartussaaffik tiggummivaat, tamatumani rektorit Naalakkersuisut rektorimit sussasaqartumit inassuteqaammik pissarsiniartarlutik. Taamaalilluni atorfinitsitsisarnermut oqartussaaffiup qitiusumiikkunaartinneqarnissaa pineqarpoq.

Siunnersuutip inatsisartuni siullermeerneqarnera

Siunnersuutip siullermeerneqarnerani inatsisissatut siunnersuutip ilinniarnertuunngorniarfinnut ataasiakkaanut aningaasatigut kingunerisassai arlallit eqqartorneqarput. Tamatuma saniatigut tjestemandinik toqqaasarneq pillugu tjestemandit pillugit inatsimmi § 4-mut tamanna akerliunersoq nassuiaateqaqqullugu Naalakkersuisut qinnuigineqarput. Naalakkersuisut siunnersuummi ajornartorsiutaasinaasunik misissueqqissaarinissaq neriorsuutigaat.

Aningaasatigut kingunerisassat qularutigineqarnerat kiisalu tjestemandit pillugit inatsimmut naapertuutsitsinissaq pissutigalugit siunnersuut aappassaanneerneckartinnagu Kultureqarnermut Ilinniartitaanermut Ilisimatusarnermut Ilageeqarnermullu Ataatsimiititaliamut suliassanngortinneqarpoq.

Tusarniaarnermut akissutit

Tusarniaarnermut akissutit inatsisissatut siunnersuummut ilanngunneqarput, tamannalu Inatsisartut Siulittaasoqarfiata ilusiliinermut piumasaqaataanut naapertuuppoq.

Siunnersuut makkununga tusarniutigineqarsimavoq: Siulittaasup Naalakkersuisoqarfianut, Peqqinnissaqarnermut Naalakkersuisoqarfik, Aningaasaqarnermut Naalakkersuisoqarfik, Inuussutissarsiornermut, suliffissaqartitsiniarnermit, Niuernermullu Naalakkersuisoqarfik, Ilaqutariinnermut Peqqissutsimut Isumaginninnermullu Naalakkersuisoqarfik, Aalisarnermut Piniarnermut Nunalerinermullu Naalakkersuisoqarfik, Ineqarnermut Sanaartornermut attaveqarnermullu Naalakkersuisoqarfik, Pinngortitamut Avatangiisinut Inatsiseqarnermullu Naalakkersuisoqarfik, KANUKOKA, Danmarkimi ilinniartitaanermut ministeriaqarfik, Avalak, ILI ILI, KIK, Meeqqat Oqaaseqartartuat, NUSUKA, SIK, IMAK, ASG, AK, Aasianni, Sisimiuni Nuummi Qaqortumilu Ilinniarnertuunngorniarfiit, Saviminilerinermut ilinniarfik INUILI, Imarsiornermut Ilinniarfik, NI-Nuuk, Center for Sundhed, Ilisimatusarfik, SPS, Oqaatsinik Pikkorissarfik, Upernaviarsummi misileraaffik savaateqarnermullu ilinniarfik, Aalisarnermut Piniarnermullu Ilinniarfik, Eqqumiitsuliornermut Ilinniarfik, Knud Rasmussenip Højskolia kiisalu inuit pisinnaatitaaffii pillugit Instituti

Tasarniaaffigineqartunitit qulingiluat uku akissuteqarsimapput, taamaattorli oqaaseqaatitaqanngitsunik: Aningaasaqarnermut Naalakkersuisoqarfik, Ineqarnermut Sanaartornermut attaveqarnermullu Naalakkersuisoqarfik, Ilisimatusarfik, Campus Kujalleq, Akademikernes Sammenslutning i Grønland, KANUKOKA aamma inuit pisinnaatitaaffii pillugit instituti.

Tusarniaaffigisat marluk uku akissuteqaamminni siunnersuummut oqaaseqaateqarsimapput: Sulisitsisut aamma Meeqqat Oqaaseqartartuat.

Apeqqutit

Ataatsimiititaliap siunnersuummik suliaqarnermini atugassatut siunnersuutip matuma aammalu tjenestemandit pillugit inatsisip akornanni pissutsit kiisalu siunnersuutip aningaasatigut kingunissarisai pillugit apeqqutitut arlalinnut akissuteqaqqullugu Kultupeqarnermut Ilinniartitaanermut Ilisimatusarnermut Ilageeqarnermullu Naalakkersuisoq ataatsimiititaliap qinnuigisimavaa. Apeqqutit aamma Naalakkersuisunut ilaasortap akissutaata assilineqarnerat isumaliutissiissummut matumunnga **ilanngussaq 1-tut** ilanngunneqarput.

Siunnersuummik ataatsimiititaliap suliaqarnera

Inatsisissatit siunnersuutip malittarisassanut ullumikkut atuutereersunut inatsisinnngortitsinerunera annertuumik oqaasertalersorneqartoq ataatsimiititaliamit maluginiarneqarpoq. Naalakkersuisut siunissami annertunerusumik tunngavilersuuteqartaqqullugit kiisalu inatsisissatut siunnersuummi ilaatinneqartut inatsisitigut inissisimanerannut sunniutit kiisalu suliassaqarfimmi pineqartumi piginnaatitsissutit inatsisissatut siunnersuummi taaneqartut erseqqissaatigeqqullugit Naalakkersuisut ataatsimiititaliamit kaammattorneqarput. Tamanna inatsisissatut siunnersuummut periutsinut atuuttunut maleruagassiornissamut taamaallaat atuumassuteqartumut aamma atuutsinneqartariaqarpoq, tassami inatsisiliortutut inissisimasut aammalu inuiaqatigiit siammasissumik inissisimasut suleriaatsinut ataasiakkaanut annertuumik paasisimasaqarnissaat naatsorsuutigineqarsinnaanngimmat, paarlattuanilli Inatsisartut Inatsisaannik, nalunaarutinik, il.il tunngavissaqartussatut isigineqartussaammata. tamanna inatsisissami inatsimmut atuutereersumut erseqqissaanerinnartut atuussinnaasariaqarpoq.

Inatsisissatut siunnersuummi matumani ilinniarnertuunngorniarfiit pillugit inatsisip allanngorneqarneratigut nunatsinni ilinniarnertuunngorniarfinni ilinniartitsisunik sulisunillu allanik atorfinitsitsisarnermi soraarsitsisarnermilu oqartussaaffik qitiusumiikkunnaartinneqassasoq ataatsimiititaliap paasivaa. Tamanna ima paasillugu ataasiakkaanik atorfinitsitsisarnermut akisussaaffik rektorip kisimiilluinnarluni aalajangersimalluinnartumillu taamaalilluni tigummagu, oqartussaasunut allami inissisimasunut il.il. tusarniaasarnissamik piumasaqaat apeqqutaatinnagu.

Piffiup atorfiginiffigisassap, suliffeqarnermi kulturi, suliffeqarfimmi pisariaqartitat assigisaasalu ilisimasaqarfiginissaat siunnersuutikkut qitiusunngortinneqartut ataatsimiititaliaq isumaqarpoq. Tamanna ataatsimiititaliamit aallaaviatigut taperserneqarpoq, tassami rektorip tamakkuninnga annertunerpaamik ilisimasaqarnissaa ilimagineqartariaqarmat.

Rektorimut piginnaatitsieq tamanna Suliniutit MIO-mit siunnersuutigineqartut atuutsinneqalersinnaanerannut killilersuutaasussanik imaqaanngitsoq Naalakkersuisut paasinninnerattut ataatsimiititaliamit paasinneqarpoq. Taamaalilluni MIO-mit

siunnersuutigineqarpoq atorfinitsitsisarnermi ilinniarnertuunngorniarfinni ilinniartut peqataatinneqartarnissaat. MIO-mit kaammattuutaata atuutsinneqalernissaani inatsisinut isumaqatigiissutinullu atuuttunut sinaakkutissat iluini sumiiffimmi aalajangersimasumillu naliliinerup tunngavissaatinneqarnissaanik Naalakkersuisut oqaaseqaataat ataatsimiititaliamit tapersorsorneqarpoq.

Inatsisissatut siunnersuut maanna ilusimisut iluseqartoq akuerineqassappat kingunerisinnaasaanik akissuteqarfigineqarnissaq siunertaralugu ataatsimiititaliap allakkatigut apeqqutit arlallit aqqutigalugit qularutigineqarsinnaasumik paasiniagaqarsimavoq.

Siunnersuutip matuma siullermeerneqarnera tunngavigalugu ataatsimiititaliamit pissusissamisoorutut isigineqarpoq Naalakkersuisut akissuteqaataat nr. 3 tjenestemandinut tunngassuteqartoq erseqqissassallugu. Tassani nassuiarneqarpoq siunnersuut manna tjenestemandit pillugit inatsimmut atuuttumut assortuuttumik inissisimassanngitsoq.

Naalakkersuisut akissut nr. 3-mi ilanngullugu Inatsisartut Siulittaasoqarfiata kaajallaasitaanut 16. Januar 2015 atuutsinneqalersumut innersuussipput. Taamaalillugu Naalakkersuisut akissut nr. 3-mi imatut erseqqissaassuteqarput.:

”Siulittaasup Naalakkersuisoqarfia oqartussaasut sulisorisanut allaffissornikkut akisussaaffii pillugit kaajallaasitaq 16 januar 2015-imeersoq aqqutigalugu maligassanik aalajangersaanikuuvoq. Kaajallaasitami pineqarput naalakkersuisoqarfii, pisortaqarfii aqutsisoqarfiillu tamarmik kiisalu taakku immikkoortortaqarfii tamarmik.

Kaajallaasitami § 1, imm. 1-imi aamma 2-mi aalajangersarneqarsimavoq qitiusumik allattoqarfimmi oqartussat ataasiakkaat nammineerlutik akisussaaffigigaat piginnaatitaaffigalugulu oqartussaaffiup iluani sulisorisanut allaffissornikkut aalajangigassat, oqartussaaffiillu ataasiakkaat akisussaaffii piginnaatitaaffiilu ilaatigut makkuusut sulisuinik atorfinitsitsineq, qaffasinnerusumik atorfinitsitsineq, pissusissanik malinnilluartitsinissamut kinguneqartitsineq soraarsitsinerlu.

Tamatuma saniatigut kaajallaasitami § 1, imm. 3-mi aalajangersarneqarpoq qanoq annertutigisumik oqartussaaffiup ataani suliffeqarfimmut imaluunniit suliffeqarfinnut arlalinnut sulisorisanut allaffissornikkut akisussaatsinerit piginnaatitsinerillu oqartussaaffii ataasiakkaat aalajangiisinnaasut.”

Lex superior-mi suleriaaseq tunngavigalugu ataatsimiititaliamit eqqaasitsissutigineqassaaq pisortat ataasiakkaat sulisoqarniarnermi ingerlatsineq pillugu akisussaaffii piginnaatitaaffiilu 1. januar 2016, ilinniarnertuunngorniarfiit pillugu inatsisip atuutilerfia tikitsinnagu ilinniarnertuunngorniarfinni ataasiakkaani atuutilisanngimmata. Taamaattoqassappat inatsisissatut siunnersuutip matuma akuerineqarnissaa soorunami pisariaqarpoq.

Siunnersuutip matuma akuersissutigineqarnissaata atuutilersinneqarnissaatalu tungaanut Naalakkersuisut ilinniarnertuunngorniarfinni rektorit innersuussinerat tunngavigalugu Naalakkersuisut ilinniarnertuunngorniarfinni ilinniartitsisunik sulisunilu allanik suli atorfinittitsisartuussapput.

Siunnersuutip aningaasatigut kingunerisassai

Siunnersuutip piviusunngortinneqarnerani aningaasatigut kingunerisassai, siunnersuummit nalinginnaasumik nassuiaatini allaaserineqarput. Tassani oqaatigineqarpoq siunnersuut maannakkutut isikkoartilluni aningaasatigut kingunissaqartussaangitsutut nalilerneqartoq.

Ilinniarnertuunngorniarfiit ataasiakkaat siunnersuummi matumani matussuseneqanngissorinartunik aningaasartuuteqartinneqannginnissaat immikkoortumik matuminnga ataatsimiititaliap suliarinninnermini pingaartilluinnarsimavaa. Atorfinitsitsinermut soraarsitsinermullu atatillugu aningaasartuutaasussat qitisusuunngitsunut, tassa imaappoq ilinniarnertuunngorniarfinnut maanna inissinneqarsimanersut ataatsimiititaliamit paasissallugu pissusissamisoorutut ataatsimiititaliamit isigineqarpoq. Ataatsimiititaliap allakkatigut apeqqutaanut Naalakkersuisut akissutitut allappaat, inatsisit maannakkut atuuttut naapertorlugit aningaasartuutit taakku qitiussuunngitsumut inissisimasut. Taamaalillugu Naalakkersuisut aallaqqaasiullugu aningaasatigut kingunerisassanik naliliinerat ilalerneqarpoq, tamannalu ataatsimiititaliamit pitsaasutut isigineqarluni.

Ataatsimiititaliap innersuussutaa

Siunnersuutip akuersissutigineqarnissaa ataatsimiititaliamit isumaqatigiittumit inassutigineqarpoq.

Taamatut oqaaseqarluni isumaliutissiissummilu allanneqarsimasutut paasinnilluni ataatsimiititaliap siunnersuut appassaanniigassanngortippaa.

Vivian Motzfeldt,
Siulittaasoq

Peter Olsen,
Siulitaasup tullia

Suka K. Frederiksen

Poul Hansen

Mimi Karlsen